

23 MAY 1997

Mahathir-Anwar

MAHATHIR TERKENANG MASALAHNYA DENGAN PELAJAR

Oleh: Azman Ujang

LONDON, 23 Mei (Bernama) -- Datuk Seri Dr Mahathir Mohamad pada Khamis terkenang masalah yang dihadapinya dengan para pelajar, termasuk Pemangku Perdana Menteri Datuk Seri Anwar Ibrahim, semasa menjawat Menteri Pendidikan pada pertengahan 70-an.

Salah satu peristiwa ialah semasa lawatannya ke kampus Universiti Kebangsaan Malaysia (UKM) di Bangi, apabila beliau di"tahan" para pelajar di tangga perpustakaan universiti itu.

Katanya para pelajar ketika itu, termasuk Anwar sebagai pemimpin pelajar yang bersemangat berapi-api, gemar mengadakan tunjuk perasaan dan ini membawa kepada sikap menentang di UKM.

Semasa bercakap kepada 400 pelajar Malaysia di Universiti Warwick, Coventry, Dr Mahathir, yang sedang bercuti selama dua bulan, menghiburkan para hadirin apabila beliau bercakap mengenai Anwar.

"Timbalan saya sekarang (Anwar) memberi pelbagai masalah kepada saya semasa saya menjadi Menteri Pendidikan. Ketika itu saya baru dilantik sebagai menteri. Saya merasakan diri saya amat penting, apatah lagi dipanggil Yang Berhormat dan sebagainya.

"Tetapi Anwar tidak menunjukkan sebarang rasa hormat terhadap saya. Tetapi saya tidak berdendam terhadapnya dan anda boleh katakan saya yang bertanggungjawab berhubung penahanannya," katanya ketika menyorot penahanan Anwar mengikut Akta Keselamatan Dalam Negeri (ISA) semasa kebangkitan pelajar dalam kampus pada 70-an.

Dr Mahathir berkata:"Anda boleh berkata yang saya bertanggungjawab atau menyebabkannya ditahan."

Tetapi, kata Perdana Menteri, keadaan sekarang berubah dan Anwar kini menjadi timbalannya dan orang yang diyakini bagi membolehkannya mengambil cuti dua bulan itu.

"Saya mempunyai keyakinan penuh terhadap timbalan saya itu dan sebab itu saya mengambil cuti dua bulan. Saya sepatutnya berehat tetapi setakat ini saya belum dapat banyak berehat," kata Dr Mahathir dalam ucapannya yang penuh humor itu.

Perdana Menteri bercuti berselang seli dengan acara-acara rasmi semasa tempoh percutian itu yang bermula 19 Mei lepas, termasuk misinya untuk menggalakkan Koridor Raya Multimedia (MSC) Malaysia.

Beliau dijadualkan berlepas dari London Jumaat untuk berehat dua minggu di Argentina.

-- BERNAMA

AU AHH